

華嚴經普賢行願品疏卷十一

唐罽賓國三藏般若奉詔譯 澄觀述疏

◎慈行童女十住章

△第十慈行童女寄灌頂住。從前觀空，得無生心，最為上首。諸佛法水以灌心頂，故從喻名。文中具六。

爾時善財童子於善知識所，起不思議最極尊重心。生廣大清淨信解心。常念大乘恆不捨離心。專求佛智常無異念心。觀法境界無有疑惑。一心繫念隨善知識。

第一依教趣求中二。先修入前教。後趣求後友。前中亦二。先思念。

無障礙智常現在前。決定住於真實智際。善能分別諸法實際。普入三世諸剎那際。隨順解了如虛空際。現見諸法恆無二際。住於法界無分別際。入一切義無障礙際。住一切劫無失壞際。隨順調伏諸業性際。如來最勝不共法際。解了如來無際之際。

後無障礙智下，明念成益。略有三益。一內證真際。

以最勝智悉能破壞一切執著顛倒想網。不取一切同異剎土差別之相。亦復不取一切諸佛眾會道場和合之相。不取佛剎清淨之相。

二以最勝智下，寂諸妄取。

了知眾生皆無有我及眾生相。亦知一切音聲語言如空谷響。亦知一切差別眾色皆如影像。

三了知眾生下，外了境空。

如是思惟，正念觀察。漸次南行。向師子頻申城周遍詢求慈行童女。聞眾人言，彼是王女，處在王宮。五百童女以為侍從。住毗盧遮那摩尼藏殿。於龍勝栴檀足金線網天衣座上而說妙法。

後如是思惟正念觀察下，趣求後友。然此二句，結前生後。五百女者，一期位滿，總攝五位十法門故。

善財聞已，詣王宮門，一心渴仰求見彼女。於時乃見無量人眾來入宮中。善財問言，諸人今者欲何所詣。人咸報言，我等欲詣慈行童女聽受妙法。善財即念此王宮門

既無限礙，我亦應入。

第二善財聞已下，見敬諮問。於中二。先睹見。後敬問。見中亦二。先明遠見。但得其門，未親證故。

遂入王宮。見其寶殿，玻璃為地。琉璃為柱。金剛為壁。閻浮檀金以為垣牆。眾寶欄楯百千雜寶光明普照而為牕牖。阿僧祇勝摩尼寶而莊校之。寶藏摩尼鏡圓滿莊嚴。世中最上光藏摩尼寶晝夜光明以為照耀。無數寶網周匝彌覆。窗闥交映，眾寶相輝。百千金鈴懸置其上。微風吹動，出微妙音。有如是等不可思議眾寶嚴飾。慈

行童女，身真金色，目髮紺青。形貌端嚴，相好具足。以梵音聲而演說法。

後遂入王宮下，近睹依正。如親證入。

善財見已，頂禮其足。繞無數匝。合掌恭敬，於一面立。白言，聖者，我已先發阿耨多羅三藐三菩提心，而未知菩薩云何學菩薩行，云何修菩薩道。我聞聖者善能誘誨，願為我說。

二善財見已下，敬問。

童女告言，善男子，汝應觀我所住宮殿內外種種莊嚴之事。善財頂禮，如教觀察。見一一壁中，一一鏡中，一一柱中，一一相中，一一形像中，一一寶網中，一一欄楯中，一一金鈴中，一一寶樹中，一一寶瓔珞中，一一莊嚴具中，一一寶形像中，一一摩尼寶中，一一光明照世毗盧遮那寶中，悉見十方一切法界一切如來從初發心修菩薩道，各各行願，各各境界，各各出興成等正覺，各各示現廣大神變轉妙法輪，乃至各各現入涅槃，如是影相種種境界，如鏡中像，亦如淨水普見虛空日月星宿。如此皆是慈行童女過去所修大善根力，所有眾像於中顯現。

第三童女告言下，正示法界。略無稱讚。於中二。先指境令觀。表示法令證。並依中見正，大小念劫皆無礙等。十住位終，果將滿故，依報顯法。

爾時善財憶所觀察一切諸佛莊嚴刹土功德行願神變之相，合掌恭敬，一心瞻仰慈行童女。

後爾時善財下，以言顯發。於中亦二。先顯法名。後彰法用。前中又二。先善財念請。

時彼童女告善財言，善男子，此般若波羅蜜普莊嚴門。

後時彼童女告下，善友言答。初示名。後顯因。名般若波羅蜜普莊嚴者，略有二義。一由般若照一切依，依中有正，一中有多。故所得依，無所不現。小品經云，了色即般若，一切法趣色。即其義矣。二由能證般若已具諸度為莊嚴故，所證所成，莊嚴無盡。即下因云，彼諸如來各以異門令我入此。總攝別義三十六恆歸於一門，故稱為普。則令一嚴具一切嚴，名普莊嚴。

我於三十六恆河沙數諸如來所，求得此法。彼諸如來各以種種異方便門，令我得入。一佛所演，餘不重說。

我於三十六恆下，顯因。住位既滿，六度之中一一具六，為三十六，皆恆沙性德本覺中來，故云佛所求得此法。若約事說，如伊舍中。

善財白言。聖者，此般若波羅蜜普莊嚴門境界云何。

二善財白言下，顯法勝用。先問。

童女答言。善男子，我入此般若波羅蜜普莊嚴門。隨順趣向，思惟觀察。憶持分別所有境界，所有威儀，所有相狀，所有證入。

後答。答中，先總。後別。總中，先明修習。

即時獲得普遍出生陀羅尼門。百萬阿僧祇陀羅尼門皆悉現前。如水漩復，速疾顯現。

後即時獲得下，顯其得證。普遍出生陀羅尼門者，舊云普門陀羅尼。一陀羅尼頓攝一切，名為普門。故次文云，百萬阿僧祇門皆悉現前。以一陀羅尼智為體故。入般若門，得陀羅尼。由此總句出生別門。法界十住，同十地得。然彼總得多種法門，此廣一持。餘三昧等，或

略不說。

所謂佛陀羅尼門，法陀羅尼門，佛剎陀羅尼門，眾生陀羅尼門，普遍陀羅尼門，過去陀羅尼門，未來陀羅尼門，現在陀羅尼門，常住際陀羅尼門。

二所謂下，別顯中。有一百五十門，略分十位。初九總知依正事理總持。

福德陀羅尼門，福德聚陀羅尼門，智慧陀羅尼門，智慧聚陀羅尼門，諸願陀羅尼門，分別諸願陀羅尼門，行陀

羅尼門，行清淨陀羅尼門，行修集陀羅尼門，行圓滿陀羅尼門。

二福德下十門，行願總持。

業陀羅尼門，業不失壞陀羅尼門，業清淨陀羅尼門，業流注陀羅尼門，業現前所作陀羅尼門，捨離惡業陀羅尼門，修習正業陀羅尼門，業自在陀羅尼門，善行陀羅尼門，常持善行陀羅尼門。

三業持下十門，諸業總持。

三昧陀羅尼門，隨順三昧陀羅尼門，觀察三昧陀羅尼門，三昧境界陀羅尼門，從三昧起陀羅尼門，神通陀羅尼門。

四三昧下六門，明正受體用。

心海陀羅尼門，種種心陀羅尼門，直心陀羅尼門，清淨心陀羅尼門，照心稠林陀羅尼門，心地清淨陀羅尼門，知眾生心所生處陀羅尼門，知眾生微細心陀羅尼門。

五心海下八門，知自他心。

知眾生煩惱行陀羅尼門，知煩惱習氣陀羅尼門，知煩惱方便陀羅尼門，知煩惱所作陀羅尼門，知眾生信陀羅尼門，知眾生解陀羅尼門，知眾生行陀羅尼門，知眾生信解諸行差別陀羅尼門，知眾生性陀羅尼門，知眾生欲陀羅尼門，知眾生想陀羅尼門，知世界所起陀羅尼門，普見十方陀羅尼門。

六知眾生煩惱下十三門，唯知所化。

普見一切法陀羅尼門，說法陀羅尼門，大慈陀羅尼門，大悲陀羅尼門，寂靜陀羅尼門，語言道陀羅尼門，解脫

陀羅尼門，普遍出生陀羅尼門，無著際陀羅尼門，方便
非方便陀羅尼門，隨順陀羅尼門，差別陀羅尼門，普入
陀羅尼門，無礙際陀羅尼門。普遍一切陀羅尼門，佛法
陀羅尼門，菩薩法陀羅尼門，聲聞法陀羅尼門，獨覺法
陀羅尼門，世間法陀羅尼門。

七普見一切法下二十門，明知能化。

世界成陀羅尼門，世界壞陀羅尼門，世界住陀羅尼門，
世界莊嚴陀羅尼門，世界形狀陀羅尼門，狹世界陀羅尼
門，廣世界陀羅尼門，垢世界陀羅尼門，淨世界陀羅尼

門，於淨世界現垢世界陀羅尼門，於垢世界現淨世界陀羅尼門，純垢世界陀羅尼門，純淨世界陀羅尼門，垢淨世界陀羅尼門，淨垢世界陀羅尼門，平坦世界陀羅尼門，高下世界陀羅尼門，覆世界陀羅尼門，仰世界陀羅尼門，側世界陀羅尼門，世界網陀羅尼門，世界轉陀羅尼門，世界各別依想住陀羅尼門，世界行陀羅尼門，細入麤陀羅尼門，麤入細陀羅尼門，大入小陀羅尼門，小入大陀羅尼門。

八世界成下二十八門，知剎海自在。

見諸佛陀羅尼門，分別佛身陀羅尼門，見佛光明莊嚴網陀羅尼門，聞佛圓滿妙音聲陀羅尼門，佛轉法輪陀羅尼門佛法輪成就陀羅尼門，佛法輪差別陀羅尼門，佛法輪無差別陀羅尼門，佛法輪訓釋陀羅尼門，佛法輪旋轉陀羅尼門，佛身普遍陀羅尼門，佛會圓滿陀羅尼門，能作佛事陀羅尼門，了知佛會差別相陀羅尼門，遍入佛眾會海陀羅尼門，諸佛光照陀羅尼門，諸佛三昧陀羅尼門，諸佛三昧自在用陀羅尼門。諸佛住處陀羅尼門，諸佛加持陀羅尼門，諸佛變化陀羅尼門，諸佛遊戲陀羅尼門，佛知眾生心行差別陀羅尼門，諸佛神通種種變現陀羅尼門，住兜率宮所作業陀羅尼門，乃至示現入於涅槃陀羅尼門，利益眾生陀羅尼門，入甚深法陀羅尼門，入微妙

法陀羅尼門。

九見諸佛下二十九門，知佛海自在。

菩提心相陀羅尼門，菩提心所從生陀羅尼門，菩提心助道相陀羅尼門，諸願陀羅尼門，諸行陀羅尼門，神通相陀羅尼門，出離相陀羅尼門，總持清淨相陀羅尼門，智輪清淨相陀羅尼門，智慧清淨相陀羅尼門，無量解脫相陀羅尼門，念力清淨陀羅尼門，自心清淨陀羅尼門。

十菩提心下十三門，大心性相。末後自心清淨，即性淨

涅槃。總攝諸門，不出於此。

善男子，我唯知此般若波羅蜜普莊嚴門。如諸菩薩摩訶薩，其心廣大，等虛空界。入於法界，智慧寬博。福德成滿，堅固不動。住出世法，遠離世間。勤求修習向一切智。智眼清淨，無諸垢翳。身語心行悉皆清淨。以差別智普入諸法。無障礙慧，猶如虛空。通達一切世間境界。獲無礙地大光明藏。善巧分別一切法義。一切世間無能映奪。常行於世，不染世法。能益於世，非世所壞。為諸眾生究竟依止。善了一切眾生語言。明解眾生種種儀式。知諸眾生業習根器。隨其心行，如應說法。

於一切處，普隨現身。於一切時，恆得自在。而我云何能知能說彼功德行。

第四善男子我唯下，謙己推勝。

善男子，於此南方，有一國土，名為三目。彼有比丘，名曰妙見。汝詣彼問，菩薩云何學菩薩行，修菩薩道。

第五善男子於此下，指示後友。國名三目者，施為行首，復開導自他，如目明照，以導餘根故。問明品中目首菩薩問於福田。財施無著以成慧眼，無畏之施以成慈

眼，法施還得成於法眼，故復云三。用上三眼，見無不妙，故友名妙見。又施行內成，勝報外現，見無不妙，出住之行。出家表之，故下文云出家未久，又行本令物出離故。

時善財童子頂禮其足，繞無數匝，戀慕瞻仰，辭退南行。

禮辭可知。上寄十住位竟。